

GALATA DILAG NAI PAULUS YOM

NAI ENA AMU LAIPU DAATE

¹ Da Paulus, da am Jesusnu totol danab. Da am danab dilag totol iita. Laa ele amu danab laa nug da Jesusnu totol udat hekulnu ii meidom. Iita. Jesus Kristus amu ig Mamenig Kayak, Nug Kristus modpanu bau mad etom ele amu, Nug ele, a aakuib da meidpid. ² Da lailad oh, da ele daatem ele, ig udug imu ag kristen tamaniak Galata apa daateb, ahilagnu yaatem. ³ Kayak, ig Mamenig, amu Nadi Jesus Kristus ele, ahilah ehanitak okai hamu megtep amu ahilah madod ele ahilagpa daaglahnu oonig daate. ⁴ Kristus Nug Kayak, ig Mamenig, Nug oo dayom amu dim lamita, Nug ihinig hipunin uhuqa megakunu, Nug nuqa bau dayak nuhig uua, ad emaitakpa mauhom. Nug anam heumnu diig am, Nug ig kobol nau, gemu wanpa daate, amu waapa ii daamtanu heum. ⁵ Amunu ig hanhan Kayak onig humagnig. Genab.

⁶ Ag Galata ag kobol hetebnu amu da oolpa ehed dootem. Kayak Nug ag Kristusnu ehanitak okai hamu matom, udat nadi amupa ag onilagpa eum amu ag pahanab Nug uuna, ag Jesusnu Nai Ena di metan, ag nai laa, danab laala ag gona mehuqeg doona, ag nai laa amunu ag, “Nai ena,” aon ateb ele amu, ag nai amu dim lamidteb. ⁷ Amge Nai Ena laa ii daate. Iita. Amge danab laala ag heeg, ahilag dab mak kabolie, danab amu ag Kristusnu Nai Ena amu eduegeg, ib laapa gokunu heteb. ⁸ Amge ig, ig Nai Ena anuka ag amelagpa mehuqmut, ig nai amubia iita mehuqkunig dayeb, o iita hab atannu engel laa nug

Nai Ena anuka ig ag amelagpa mehuqmut amubia iita mehuqku dayeb amu, aria danab amunu amu, Kayak Nug nuhigpa ehed had! ⁹ Da ag amelagpa ami, amubia da aaku baula atem. Am danab laa nug nai laa, Nai Ena anuka ig ag amelagpa mehuqut aopig amubia iita amu, nug ag amelagpa nai laa amu mehuqeb, aria Kayak Nug danab amu ehed had! ¹⁰ Nai da gemu atem imu amu danab ag dahilnu oolagpa ena dooglagnute atem? Iita! Da Kayak Nug dahilnu oo ena dookunu hetem. Da am danab ag oolag itag qekunuib hetemte? Am da danab itag qekunu hetem dayeblob amu aria da Kristusnu udat nid iita daalom.

PAULUS NUG TOTOL DANAB BEUMNU NAI

¹¹ O lailad, da tutuku ag amelagpa iiku atem. Nai Ena anuka da ag amelagpa mehuqmi amu danab laa he ii beum. ¹² Da amu danab laa nuhigpanu ii aomi. Laa ele amu danab laa nug da amu ii ipuniḍom. Iita. Jesus Kristus Nug nuka da ipuniḍom.

¹³ Am da kobol anuka, haen da Juda dilag kobol amu dim lamite, kobol hemi amu ag amu dooteb. Kayaknu kristen tamaniak aqak danab am da iiku, ag iita mekulagnu da wagai mein, huana hemi. ¹⁴ Da lailad oolagpa, danab bau kudum da ele huu laipu amu da ag edate, da Juda dilag kobolnab dim lamidmi. Da alalad adi dilag kobol amu, da amu oh gagaḡagnab dim lamidkulnu hemi. ¹⁵ Amge Kayak, Nug anai da ii menuiḍom haenpa, Kayak Nug da tituanida, nuhig ehanitak okai hamu megte, amupa Nug da onilpa eum ele amu, Nug nuka dahilnu dab ma, ¹⁶ Nug da Nug Bekanu Nai Ena amu iita adi amelagpa mehuqkulnu da ipuniḍom amge da haen amupa adi nai

mehuq̄kulnu danab laala ele nai ii maṭimut. ¹⁷ Amu danab tatam ag Jesusnu totol danab daap̄ig amu da ag gumate Jerusalem ii gomi. Iiṭa. Da Arabia wanpa gomi. Uq̄oya dimpa am da eḍue Damaskus gomi.

¹⁸ Aria dimpa maḍ ewam uke amu da Petrus ele nai maṭignihnu Jerusalem gomi. Am da Petrus ele deḍ 15 anam daamuḍ ¹⁹ amge da Jesusnu totol danab laa ag ii anadmi. Da Jakobus, Naḍi amag, nugib da anidmi. ²⁰ Nai imu gemu da ahilagnu yaatem amu da Kayak noobpa nai genab aṭem, da ag ii bupualadṭem. ²¹ Amu dimpa amu da laih Siria am Silisia dilagpa gomi. ²² Amge Juda kristen tamaniak, ag Kristus ele tamanipig amu, ag da iḍul anidna ii doop̄ig. ²³ Ag nai inam aakuib maṭieg doop̄ig. “Anuka danab nug ig iqom, nug aun aḍi ag oopa genab doyak ele, ahilagnu ehed̄ heum amu, gemu nug Nai Ena amu mehuq̄te,” anam ap̄ig. ²⁴ Kayak Nug dahilpa anam he, ag nai doonna amu ag Nug onig humap̄ig.

2

TOTOL DANAB LAA PAULUS ELE OOLAG LAIPU DAYOM

¹ Da anam hei uke, maḍ 14 uue amu da Banabas ele amu i oh eḍuḍ Jerusalem goḍa, da Titus ele omali, ig oh gomut. ² Kayak Nug da ipuniḍe, da aaku gomi. Da uk̄en, “Da totol danab amelagpa, da iṭa aḍi oolagpa Nai Ena mehuq̄tem amu da amunu ii ak̄ul amu uḍat da gemu heṭem imu, uḍat tatam hemi ele amu, uḍat amu oh hamu uk̄a qeṭod̄kutai,” dab memi amunu da totol danab apa daap̄ig ele amu, da ag aka aakuib ele daatta, da amu ipuanadmi. ³ Ag Nai Ena da mehuq̄tem ele amu, ag amunu ehed̄ doon aib ak̄ulagnu baḍami amge iṭa. Ag ena doona, ag Titus nug da ele

daamud, nug am Grik danab amunu nug am gada otadak iita amge qag makpa ag ig nug gada otadkunignu ii apig. ⁴ Am genab lainkad laala, ag gadalagib kristen, ag, "Ig ag ele oh oopa genab doyak laipupa daatem," anana, ag gada otadak kobol dab menana amu ag Titus gada otadaknu madipig amge ig ahilag nai ii dim lamidmut. Ag Kristus Jesus, nuhig ehanitak kobol ig mekom amupa qe lamidna, ag ig Jesus dim lamidrata, uhuqak ena aot daatem, ag amu ameg qakak kobolpa anidkulagnu hepig. Do nug ig atad guikom amunu Kristus Jesus Nug ig do waapa daamtanu uhuqikom amge danab amu ag edun ig aigna, do waapa daagnignu Titus gada otadkunignu hepig. ⁵ Amge ig Nai Ena amu ag iita adi, ahilagpa hanhan daakunu oonig dayom amunu ig amu dilag nai amu nakoknab laa ii dab memut.

⁶ Aria danab da ele daamut, ag da nai mehuqtem ele amu, ag nai amu ii tudidpig. Eleleib doopig. Danab laa ag amu dilagnu, "Danab okai," ateb amge amuam genab o genab iita, da amunu dab ii metem. Adinu? Kayak Nug danab onignu dab ii mete. ⁷ Danab amu ag nai dahil ii tudidpig. Iita, ag doopig, Kayak Nug Petrus Juda oolagpa Nai Ena mehuqkunu meum bia, da Nai Ena, iita adi amelagpa mehuqkulnu meidom. ⁸ Ao, Kayak Nug Petrus Juda oolagpa Jesusnu total udat hekunu gagatag metom amubia Kayak Nug da iita adi oolagpa Jesusnu total danab daakulnu gagatag medom. ⁹ Jakobus, Petrus, Johannes ele, laa ag ahilagnu, "Ag am iki danab," aon ateb amu, ag Kayak Nug ehanitak okai hamu megte amupa Nug da udat imu hekulnu medom doopig. Ag anam doopig amunu ag da Banabas ele i epenih daeg, ig oonig laipu

meta, da Banabas ele i am iita adi oolagpa udat hebupud, ag am Juda danab oolagpa udat hekulagnu amut. ¹⁰ Ig anam atata, ag i dadek danab dilag dab mekunihnu aakuib apig. Keeke amunu amu, da ool huana hete, da amu hekulnu da udat gagatag heinne daatem.

PAULUS NUG PETRUSNU EHED HAK MIAG ATIOM

¹¹ Ig anam hemut amge Petrus nug Antiok udie, da nug noobpa nuhig nai amu da okulmi. Adinu? Nug ehed imu heum. ¹² Haen Jakobusnu danab laala Antiok ii bepig, haen amupa Petrus nug iita adi danab ele daanna, oh e lapig amge danab amu ag beeg amu, aria nug danab amu, ag am gada otadak kobolnu gagatag dab meteb ele amu, nug ag badaa, Juda dilag do dim lamidkunu ha, iita adi ele daapig amu edua uuata, laikudib ele daapig. ¹³ Petrus anam he amu Juda danab laala ele ag nug ele kobol ham bupuak amu hepig. Am ag kobol ham bupuak dim lamiteg uke, Banabas ele nuhig dab mak edue, kobol amupa noum.

¹⁴ Aria ag Nai Ena ipunigte amubia ii oipig anidmi amunu da ag noolagpa Petrus amegpa ami. “Na Juda danab amge na matu Juda dilag kobol uuna, iita adi ele e lapig. Na ag kobol dim lamidteb bia heme amunu adinu na gemu iita adi, ag Juda kobol amu dim lamidkulagnu gagatag hetem? ¹⁵ Am genab, ig Juda danab ig iita adi, ag Mosesnu do iita ele amu, ig ag do amu iita ele oiteb bia ii oitem. Iita. ¹⁶ Amge ig dootem, Kayak Nug danab do dim lamidte amunu, danab amunu, ‘Danab tutuku,’ ii ate. Iita. Danab nug Kristusnu oopa genab doote, danab amunu aakuib Kayak Nug, ‘Danab tutuku,’ awa ate. Am ig ele, ig Kayak noobpa, ihinig oopa genab doyakpa, ig do dim lamitakpa iita, ig danab tutuku daagnignu Jesusnu

oonigpa genab doomut. Ađinu? Danab laa nug do dim lamidte, diig amunu Kayak Nug danab amunu, 'Danab tutuku,' ate laa iinab daate. iita.

¹⁷ Aria, ig Mosesnu do oh dim lamidta, danab tutuku bekunignu elele iita amge ig Jesusnu oonigpa genab dootem amunu Kayak Nug ihinignu, 'Danab tutuku,' ate. Amu ig ib amupa danab tutuku daatta, ig haen amupa ig iita adi ag Mosesnu do laala tipaldeb, amubia tipaltem dayeb amu, ig, 'Kristus Nug hipunin hekunignu eedikom,' akunigte? Iitanab! ¹⁸ Danab laa nug tatam kobol laanu, amuam kobol ehed doya uua, dimpa nug edua kobol amu dim lamidte amu nug aaku hipunin hete miag atite. Amubia da tatam iita adi ele e lakunignu, 'Am ena,' ainne, dimpa da amunu, 'Amuam nau,' akul dayeb amu amupa da Nai Ena aomi ele amu da ii dim lamidtem amunu da am hipunin hetem miag atite. ¹⁹ Do nug da iwe mauhmi, nug gemu da ii hipalidte amunu da Kayak waapaib daakulnu daatem. ²⁰ Da Kristus ele oh ad emaitakpa aihlop bia mauhmi amunu da gemu bau daatem, bau amuam daka dahilpaib iita. iita. Kristus Nug da oolpa bau daate. Anam daate amunu dahil oiyak wan imupanu oh amu da Kayak Bekanu oolpa genab doyeye oitem. Nug dahilnu oo mauhe amu dahilnu ele mauhom. ²¹ Da Kayaknu ehaniatak okai hamu megte ele amu, da amunu amu da keeke hamu bia ii dootem. Am ig danab ig do dim lamidta, danab tutuku bekunignu elele daalom amu Kristus Nug ihinignu mauhom amu Nug aaku hamu mauhlo." Da anam Petrus amegpa ami.

3

DO DIM LAMITAK, OOPA GENAB DOYAK KOBOL ELE

¹ Galata ag am kaaka danab. Da Jesus Kristusnu ag amelagpa matiiyi, ag geha aaku Nug ad emaitakpa atuleg dayeye anidpig bia doopig. Amu aun nug he, gemu ag kaaka aqom? ² Keeke laipuib da ag od madapi ag apeg doyei! Ag Kayak Oudi aopig, ag atem hena Nug aopig? Ag do dim lamidna aopigte? O iita ag Nai Ena doona, oolagpa genab doopig amupate ag Kayak Oudi aopig? ³ Ag genab kaakanab aqomte? Ag Kayak Oudinu gagatagpa udat dig mepig amu gemu ag aka ahilag gagatagpa udat malan, tutuku elelenab bekulagnu hetebte? ⁴ Anuka ag keeke ena aopignu amu gemu ag amu daulag atie, padaeg ne, meu ii otete? Genab o genab iita ag keeke ena amunu hamu doona padapigte? ⁵ Ib atenpa Kayak Nug nuhig Oudi ag maata, ag oolagpa udat laala, danab hekunu elele iita ele, hete? Nug ag donu udat hepig amupa Nug anam hetetai? O iita, Nug ag Nai Ena doon, ag oolagpa genab doopig, ib amupa anam hetetai? Ib laa iita, Nug oopa genab doyak agupaib hete.

⁶ Amuam Kayak naipa Abrahamnu yak daate amubia. Nai amuam inam. "Abraham nug Kayaknu oopa genab doye, Kayak Nug Abrahamnu oopa genab doyak anta, nuhignu, "Danab tutuku," awa aum. ⁷ Anam daate amunu ag doyeg! Danab ag Nai Ena oolagpa genab dooteb ele, danab amu ag am Abraham bekodnab. ⁸ Am Kayak Nug anuka iita adi ag geha Nai Ena aona, ag oolagpa genab doopeg, ahilagnu Nug, "Danab tutuku," akunu doya he, ag Kayak naipa yaapig daate. Nug anam doyom amunu Nug anuka Abraham amegpa Nai Ena mehuqaqa, inam aum. "Nahippa geha, danab budub oh ag ititak aoglag," awa

aum. ⁹ Amunu danab ag oolagpa genab dooteb ele amu, ag Abraham, nug am danab oopa genab doyak ele amu, ag nug ititak awom bia aoteb.

¹⁰ Amge danab ag danab tutuku bekulagnu amu ag, “Ig do dim lamidta tutuku bekunig,” dab menan ateb ele amu, danab amu ag nob nau aoglagnu daateb. Adinu? Kayak naipa nai amunu inam daate. “Danab oh ag nai hupu oh do yak udugpa daate amu oh tutukunab ii dim lamidna, oh elele ii hena amu ag nob nau aoglag.” ¹¹ Laa ele amu Kayak naipa yak laa daate am inam. “Danab nug oopa genab doote amu geha Kayak Nug danab amunu, “Danab tutuku,” awa ab, danab amu nug bau daaku. Anam daate amunu ig imu dootem, danab laipu laa do dim lamidte, Kayak Nug danab amunu, “Danab tutuku,” akunu amu ib laa iita. ¹² Do dim lamiita, tutuku bekonu kobol diig am oonigpa genab doyak iita. Iita. Kayak naipa kobol amu diignu nai inam daate. “Danab nug do ohnab dim lamidte ele amu, nug geha bau dayak aoku.” Amupa ig do nug am udatnu keeke anidtem. ¹³ Do nug ig nob nau aognignu ate amge Kristus Nug Kayak naipa yak laa, “Danab oh ag ad atan aihadteb ele amu, danab amu ag nob nau aoteb,” Nug nai amu ate amubia ig ounig daya, nob nau amu awa ehanika, ig edua awikom. ¹⁴ Kayak Nug Abraham ititak metom, Nug ititak amu aakuib Jesusnu udat nadipa, Nug iita adi ele mada kunu, ig kristen oh ig Nai Ena doout, oonigpa genab dootem, amupa ig nuhig Oudi megakun nai qaqa aum amu, ig Nug aognignu, Kristus Nug ig ounig anam beum.

DO NAI, KAYAK NAI QAKOM ELE DILAH NAI

¹⁵ O lailad, gemu da ig danab ihinig kobol daate amupa atem. Danab laa nug geha dimpa mauhku, nug amunu dab

ma, nug enub oh beḱod aoglagnu amu nuhig dab makpa elele otia, anen anen adi aoglagnu ad uḱugpa yeeb, danab laa ele nai amu anṭa, onig yeeb amu danab laa nug nai amu ii qeeb nema, o laa nug nai amu baolia nai laa ii tuḱidma. ¹⁶ Aria Kayak Nug dimpa keeke ena beḱunu amu Abraham amegpa nai qaḱa aum. Nug nai qaḱa aum amu Nug Abraham amu nug buḱub oopanū laa ele, ahilahnuib nai qaḱa aum. Nug buḱub oh amelagpa ii aum. Iiṭa, Nug laipunuib amegpa nai qaḱa aum, amu nid amu Nug am Kristus. ¹⁷ Nai dahil imu, nuhig diig amu inam. Kayak Nug tatam Abraham tituana, keeke laa heeb beḱunu nai qaḱa a, dimpa maḱ 430 uḱe amu aria ḁo aaḱu beum. ḁo amu dim beum. ḁo amu nug Kayaknu tituana nai qaḱak amu qeeb neḱunu elele iiṭa. Nai qaḱa aum ele amu, ḁo nug amu lopadḱunu ele elele iiṭa. ¹⁸ Am ig ḁo dim lamitak kobolpa keeke ena, Kayak ig aognignu tituanikom ele amu, ig amupa aognignu elele daalom, aria am ig dooṭem, keeke ena amu nai qaḱa anakpa ii aolom. Amge anam iiṭa. Kayak Nug Abraham amegpa keeke heḱunu nai qaḱa aum amunu Nug heum.

¹⁹ Aria, aḁinu Kayak Mosesnu ḁo meum? Amuam iḱu. Kayak Nug hipunin diig amu geha miag atikunu oo dayom amunu Nug ḁo amu tuḱite, dimpa aaḱu beum. Amu ḁo nug dayeb uḱeb, geha Jesus beḱu amu batak daaḱunu meum. Kayak a, engel ag Moses ḁo ipuniteg, nug gamag danab dayaya ḁo awa, danab ah ipuanatōm. ²⁰ Aria gamag danab nug danab laipu nug nai nuhig qaḱa, keeke laa heḱunu aṭe amu, gamag danab nug haen amupa uḁat laa ii heṭe. Iiṭa. Danab aḁit o ewam keeke, ag tituanḱulagnu heṭeb dayeb amu gamag danab nug daaḱunu elele amunu

Moses nug gamag danab dayeye, Israel ag do aopig. Amge Kayak anuka Abraham amegpa nai qaqa, keeke laa hekunu aum, Kayak nukaiab nai amu keeke hekunu aum.

²¹ Anam amunu do nug am Kayak anuka nai qaqa aum ele, amunu kekedte? Iitanab iita! Adinu? Ib adit amu oh am ig danab tutuku bekunignu udat hetep amge do nug ehanigkunu elele iita. Amge do laapa ig tutuku danab bauklele ele bekunignu daalo amu ig ib amupa danab tutuku belom. ²² Amge Kayak nai danab oh hipunin waapa daateb ipunigte amunu danab oh, ag Jesus Kristusnu oolagpa genab dootep ele, Kayak Nug keeke mada-kunu Abraham amegpa nai qaqa aum ele amu, ag aoglagnu elele daateb.

²³ Jesus Kristus Nug ii nak haenpa, do nug ig hipalike, ig nuhig udat heutum uke, Jesus Kristus Nug udia he, ig Kayak noobpa tutuku daagnignu ib laa, amuam oopa genab doyaknu ib, ib amu aaku miag atiom. ²⁴ Do nug am gumikak danab ihinig bia, nug ig omaika, Kristus topa wab, ig Nai Ena oonigpa genab dooput amu Kayak Nug ihinignu, “Danab tutuku,” awa akunu dayom. ²⁵ Gemu Jesus Kristus Nug udat nuhig ha malom daate amunu do nug baula gumikak danab ihinig ii daate.

OOPA GENAB DOYAKPA KAYAK BEKOD DAYAKNU NAI

²⁶ Ag oh Kristus Jesus ele ou qena, ag nuhignu oolagpa genab doopig amunu ag Kayak bekod daateb. ²⁷ Ag Kristus ele ou qena, Kristusnu layatak aopig amu ag Kristus oiyom bia oiglagnu daateb. Ag oh Kristus ele ou qak daateb. ²⁸ Amunu gemu Juda danab am ena, Grik danab am nau, dab mak amu ii daate. Begbeg danab ag am keeke hamu, danab ena ag am keeke genab, dab mak amu ele gemu ii

daate. O iita danab ag am onilag ele, ah ag am onilag iita, dab mak amu ele ii daate. Iita! Ag oh amu Jesus Kristus nuhigpa oh laipu daateb. ²⁹ Amu ag Kristusnu daateb dayeb amu, aria ag am Abraham budub aaku daateb amunu ag aaku Kayak Nug anuka Abraham amegpa keeke laa heeb bekunu nai qaqa aum amu, ag amu aoglag.

4

¹ Aria tuditaknu amu nid nug mamegnu keeke oh aokun daate, nug keeke amu oh gumakunu daate amge haen nug danab ii meum amu nug begbeg bia daate. ² Nug gumak danab laala waalagpa daye uke, dimpa mameg nug abenab aokunu haen meta tituanom amupa nug aben amu aote. ³ Ig ele am anamib. Jesus ii neum haenpa amu ig nid naunau bia daat, ig wan imupan do gagatag iita ele amu ig amu waapa daamut. ⁴ Amge anam daye uke, haen Kayak aum amu elele mete, Kayak Nug Beka me ne, ah nug menue, Nug do waapa ba dayom. ⁵ Nug ig do amu waapa daamut amunu edua awikeb, uhuqak ena daagnignu, ig Kayak bekod beta daagnignu ele anam heum. ⁶ Gemu ag Kayak bekod daateb amunu Kayak Nug beka Jesusnu Oudi, Nug Kayak amegpa, “Mame, Mame!” ate ele amu, Nug Nug me, ig oonigpa daate. ⁷ Amunu na baula begbeg ii daatem. Iita. Na nuhig nid daatem. Am Kayak Nug na awitom, na Nug beka daatem amunu Nug bekod keeke aoglagnu aum amu na aokutnu daatem.

PAULUS NUG GALATA DILAGNU DAB MAK KUDUM AWOM

⁸ Genab, anuka amu ag Kayak ii doopig amunu ag kayak bau iita ele, keeke Kayak heum ele, amu dilag begbeg udat hepig ⁹ amge gemu ag Kayak doopig (da Kayak Nug ag doyaatom alom am ena) amunu adinu ag edun, bitumtum

gona, wanpan do gagatag iita amunu hik aqeqe, ag edun udat nob iita, hamu begbeg udat hekulag_{nu} heteb? ¹⁰ Ag Kayak noobpa ena daaglag_{nu} amu ag hanhan ded okai amu kalam bau bak, metid okai amu mad bau ele anidna, amupa gun mena daateb. Amu elele iita. ¹¹ Ag anam heteb amunu da ahilag_{nu} udat okai hemi ele amu, da amunu, “Da hamutai kakidmi,” ainne, bade daatem.

¹²⁻¹³ O lailad, da ag oiteb bia oimi amunu gemu ag da oitem bia oiglag_{nu} unuqadtem. Ag dooteb, da tatam diig mein, Nai Ena ag amelag_{pa} mehuqmi ele amu haen amupa da ode ele amunu da ahilag_{pa} nai mehuqmi amge haen amupa ag diig amunu ag dahilpa ehed laa ii hepig. ¹⁴ Genab, ode dahilnu amu ag amunu ug maopig amge ag da ii guhudilpig. Amu ag oolag da medan, amupa ag da ii uuidpig. Iita. Ag Kayaknu engel laa aolob amubia da awidpig. Ag Jesus Kristus aolob anam bia ag da awidpig. ¹⁵ Oo gamag ahak ahilag_{pa} dayom amuam gemu adep mepig? Da genab ag amelag_{pa} kobol ahilag ena amunu atem. Haen amupa ag amelag kehaknu elelelob amu, aria ag kehan da melpa melob. ¹⁶ Gemu da nai genab ag amelag_{pa} atem amunu ag dahilnu, “Nug ehed heigkunu hete,” atebte?

¹⁷ Genab, danab laala ahilag_{pa} udat heteb amu ag wagai mena eedadkulag_{nu} amelag qagateb amge nai itag amuam kobol enapa ii gotte. Danab amu ag hepeg, ag Galata danab ag ig ele ou qak ii daaput, ag Galata ag edun danab amu binalag mekulag_{nu} heteb. ¹⁸ Am ig Nai Ena dim lamidkunignu, kobol ena ele hekunignu wagai mekunig am ena. Ag haen oh, ig ou qak daatem, ou qak ii daatem ele amu, ag anam hekulag_{nu} am ena. ¹⁹ O

nid dahilad, da ag kristen bekulagnu guitak nadi, ah nid menukunu guitak doote amubia doomi amu gemu da ag Kristus date bia bekulagnu guitak amubia baula dootem. ²⁰ Gemu da ag ele oh daatta, da odelpanab ag amelagpa nai matilomnu ool date. Adinu? Gemu da ahilag kobolnu amu dab mak kudum aotem.

HAGA SARA ELE DILAH NAI

²¹ Ag Galata danab, ag edun do wapa daaglagnu heteb ele amu, ag gemu apeg doyei! Ag do nai ate amu ag iitai dooteb? ²² Kayak naipa yak laa Abrahamnu amu inam date. Abraham nug bekodi adit, begbeg ah nug laa menue amu Sara, nug am begbeg iita, nug nid laa menuom. ²³ Ismael anig amu, nug am begbeg ah, amu nug danab ah menuak kobolpa Ismael menuom. Aria Abraham Sara ele, a nid menuglahnu elele iita amge Kayak Nug a nid menuglahnu nai qaka ana he, a nid menuglahnu elele daaiya, Sara nug nid amu menuom.

²⁴ Amunu kaya amupa ig keeke laa anidkunignu elele. Ah adit amu a nug tituana nai qakak adit ipunigtep. Laa am Sinai qaukopa do nai Moses nug Kayak epegpan awom. Nug tituana nai qakak amu begbeg ah Haga, bekod do wapa dateb, nug amu ipunigte. Laa amu Kayak nai qaka aum. Nug tituana nai qakak amu, Sara nug ipunigte. ²⁵ Qauko Sinai, amuam Arebia dilag qauko laa, nug danab ag Jerusalem oopa gemu dateb, ag do wapa begbeg dateb, amun ipunigte. ²⁶ Amge Jerusalem laa, Sara amu ipunigte amu, amuam hab atan date, am Kayaknu. Nug amu nid genab, begbeg iita. Amuam ig kristen, ig aninig aku date. ²⁷ Kayak naipa amunu nai laa inam date. “Ah na oot kel doak, na nid menuaknu laa iita, na gaman ahad! Ah, nid awaknu guitak ii doome ele amu, na ootpa

ena doye! Na oden opatna ekut! Adinu? Ah oo kel doak Nug am bekod kudumnab, eb qak ahilag amu ah danab ele bekalti dilag eb qak amu editak.”

²⁸ O lailad, ig am Isak bia. Kayak Nug Isak dokunu nai qaqa a, nug doum amubia ig nuhig naipa ig Nug bekod bemut. ²⁹ Amge Abraham haenpa, nuhig nid laa, nug anig danab ah nid menuṭeb kobolpa menuom ele amu, nug am nid laa amu guhuditom. Nid nug guhuditom ele amu, nug anig Sara, nug Oudi kobolpa menuom. Gemu ele kobol anamib aaku daate, laa nidnab ii daateb am laa nidnab daateb guhudateb. ³⁰ Amge Kayak naipa nai amunu adi daate? Nai inam daate. “Bebeg ah nug beka ele amu lamate! Bebeg ah beka amu nid Kayak a, Sara menuom ele amu, a oh mamelahnu keeke ii aomya. Iita. Saranu nid aakuib aoku.” ³¹ Anam amunu o lailad, ig am bebeg ah bekod iita. Ig am Kayak a, ah nid menuom ele, ah amu bekod daatem.

5

KRISTUS NUG AM UHUQAKNU DIIG

¹ Kristus Nug ig donu mani guitak hipalikakpanu uhuqikom, ig hamu ena daatem, ig bebeg ii daatem amunu ag ahan gagatag dayeg! Ag donu mani guitakpa baula aib daapig.

² Doyeg! Da am Paulus amu da ag amelagpa atem. Ag am Kayak noobpa ena daaglagnu henana, ag do dim lamidna, gadalag otadkulag dayeb amu geha Kristus udat heum daate amu ag ii ehanadma. Iitanab iita. ³ Am danab oh ag gadalag otadateb amu da iiku miag amelagpa atem. Ag kobol amu heteb amu, ag do oh dim lamidkulagnab aakuib am elele. ⁴ Am ag do dim lamidkulag, amupa

Kayak Nug geħa aħilagnu, “Danab tutuķu,” awa aķunu dab meķeb amu, amupa ag aaku Kristus uupig, ag am Kayaknu eħaniķak oķai ħamu meķte amu, ag amupa ii daaķeb. ⁵ Amge iħinignu amu Kayak Ouđi Nug eħaniķeķe, ig oopa genab doyak iħinigpa, ig Kayak Nug iħinignu, “Danab tutuķu,” awa aķunu ameg meķem. ⁶ Am danab nug Kristus Jesus ele ou qak daaķep amu nuħigpa gađa otadaķ kobol, o iita gađa ii otadaķ kobol, ađit amu oh am keeke ħamu. Nuħigpa keeke laiķuib am oķai daaķe. Amuam danab nug oopa genab doye, laa dilagnu oo mauħte.

⁷ Anuķa ag am ena oipig. Am aun nug ib oo ne, ag nai genab amu baula ii dim lamidķeb? Nug aķem he, ag amu uupig? ⁸ Kayak, Nug ag onilagpa eum ele amu, Nug dab mak ag ġemu dim lamidķeb ele amu, ag ii maķom. ⁹ Yis nakoknab amu he, bret oh titidķte amubia dab mak nau nakoknab, amuam heeb, ag oh padal memananu dab meig! ¹⁰ Da Nađinu oolpa genab dooķem amubia Nug ag eħanaķeb, geħa ag nai da amelagpa aķem imu dim lamidna, ag geħa dab mak laa amu ii ađaglagnu oolpa genab dooķem. Amge danab auntai nug ag kaboliadķunu heķe amu, nug geħa nuħig eħeđ ħaknu nob nau aoķu. ¹¹ O lailad, genab da danab ag gađalag otadķulagnu nai meħuķtem dayeb amu, ađinu laala ag da iuglagnu meidķeb? Am da nai anam meħuqlom amu laa ag ad emaitak nainu dab mak eħeđ aolobte? Iita. ¹² Am danab ag heeg, ag Galata danab ag kaboliadķeb ele amu, danab nau amu ag, ag Galata danab uuadna goķulagnu, tamaniak oopa ii daaglagnu, ool oķai daaķe.

¹³ Genab o lailad, Kayak Nug ag uħuqak elele daaglagnu onilagpa eum amge ag aħilag dab makpa aib inam apig. “Ig uħuqak elele daaķem amunu ig beđunu kobol ele

hekunig.” Ag anam aib apig amge ag lailkad dilagnu oolag mauheb, ahilag begbeg daanna, ehanateg! ¹⁴ Adinu? Do oh amu nai laipu imu oopa daateb. “Na naka nahipnu oot mauhte, amubia na danab laa dilag ele oot mauhad!” ¹⁵ Amge ag oolagpa aka aka naipa nug qemananu, ag nug emalak hemananu amu dab meig! Ag anam hekulag am ag oh padal mekulag!

KAYAK OUDINU KOBOL AMU OO ALAGNU KOBOL ELE

¹⁶ Da inam atem. Kayak Oudi Nug oiyak ahilag gumebeb, ag Nug dim lamidna oiyeg! Ag anam hena amu ag bedunu kobol ii dim lamidmana. ¹⁷ Bedunu kobol amu Kayak Oudinu kobol ele a laipu iita, a pide pide amunu Kayak Oudi Nug bedunu kobol guhuditete, bedu amu Kayak Oudi guhudidte. Anam daate amunu ag keeke laa hekulagnu oolag unuqagpa daate amu ag elele iita. ¹⁸ Anam daate amge ag Kayak Oudinu ehanitak aon oiteb dayeb amu ag do dim lamitak udat amu ii hemana.

¹⁹ Ag bedunu kobol amu ag aaku dooteb. Amu inam. Gapai kobol diigdiig, ²⁰ kayak ham bupuak binag metak, onig awak kobol, keked metak kobol, heqopa qak kobol, oo aeg bak kobol, opodi huana bak kobol, ameg qak kobol, enaen ma binag mak kobol, huu obatak kobol, ²¹ laanu keeknu ameg qak kobol, le gagatag la kaaka qak kobol, hak nau idu idu ele aaku daate. Da anuka ag amelagpa ami amu gemu baula ag amelagpa atem. Danab oh ag kobol amu heteb amu ag Kayaknu do madod ii aomna.

²² Bedunu kobol am aaku amge Kayak Oudi Nug he, oiyak ihinigpa meu laala imu bete. Oo mauhak kobol, oo gamag ahak kobol, oo madod kobol, oo doyak kobol, oo bodo etak kobol, diig tutuku genab ele hak kobol, ²³ oo gai iita doyak kobol, oiyak dab mak ele hak kobol. Kobol

amunu oh, amu haknu do laa ii daate. ²⁴ Kristusnu danab oh ag oolag alag amu nuhig bedunu kobol amu oo ahak kobol ele oh ad emaitakpa atulpig daateb ²⁵ amunu Kayak Oudi Nug ig bau megte dayeb amu ig Nug waapa ele daatu! ²⁶ Ig adi kobol heput, ig lainkad opodilag beku amu ig kobol amu ii hemata, ig ahilag keekenu ele amenig ii qema. Ig amubia ii hetata amu ig oninig ele aib humamut.

6

LAILKAD DILAG EHANATAKNU KOBOL

¹ O lailad, danab laa nug hipunin laa heeb, ag anidna amu ag danab ag Kayak Oudi ele, ag danab amu edun aoglagnu nai bodo etak madodpa oo babaiteg! Ag aib nuhignu guhuditak kobol hepig. Ag oh anen anen ahilagnu dab meig! Satan nug ag ele eedadkunu daate. ² Ag lailkad ehanadpeg, ug ahilag amu oh maweg! Ag kobol amu hena, ag Kristusnu do amu elele dim lamidkulag. ³ Danab laa nug ham bupua, hamu diig iitapa, “Da onil ele,” anana, nug nuka onig humate, amuam meu iita. Danab amu nug nuka nug oo bupuidte. ⁴ Danab oh ag anen anen ahilag udat melemel metan epedieg! Ag anam hena amu ag ena hetebte o ehedte heteb dooglag. Danab nug anam hete amu nug nuka nuhig kobolnu gamag ahaku. Nug danab laanu kobol amu nuhig kobol ele melemel ma aib epediom. ⁵ Adinom? Danab oh ag anen anen ahilag udat amu maoglagnu dab mekulag am ena.

⁶ Danab nug Kayak nai dookunu ipunitak danab laa waapa daate amu nug nuhig keeke ena oh elele opaata, laih amu nuhig ipunitak danab amu metad! ⁷ Laa nug ag bupualateb, dim lamidmananu am dab meig! Laa nug Kayak ham bupuidkunu elele iita. Amu inam. Danab nug

e tumu ebate amu geha dimpa e tumu epom amuib meu amu aoku. ⁸ Amubia danab laa nug bedunu kobolib haaha oite amu nug bedu kobolnu meu nau, padal mak aoku. Amge danab nug Kayak Oudinu ehanitak awa ada, amupa oiyaya, Oudi kobol amu dim lamita oite, Oudi Nug danab amu bauklel meteb, nug hanhan bau ena daaku. ⁹ Amunu ig kobol ena hekunignu amu ebehinig aib bodo etom. Ig ebehinig bodo ii edaku amu aria geha meu awak haenpa ig meu ena aaku aognig. ¹⁰ Amunu ig hanhan danab oh ehanadkunignu ib anidta amu ig ehanadtu! Amu ig Nadinu oopa genab doyak lainkad dilagpa kobol amubia hekunignu dab mak aot auta aognig.

BAG QAK NAI

¹¹ Ag dahil yak geha iiku dig metem imu am yak okaipa ag tutuku dab mekulagnu yaatem. ¹² Danab laala ag onilag okai ele daaglagnu heteb, ag Galata danab ag gadalag otadkulagnu wagainab meteb ele amu, ag diig laipupaib heteb. Amuam inam. Ag danab laala ag Kristus ad emaitakpa ehanigkunu mauhom oolagpa genab ii dooteb dab menana, ehed hadmananu gada otadak nai amu huana maditeb. ¹³ Danab amu ag gada otadak aopig amge ag do tutuku dim ii lamidteb. Danab amu ag do tutuku ii dim lamidteb amge ag amunu ii dab menana, ag Galata dateb ele amu ag eedateg, ag gadalag otadeg, laa amu ag lailkad amelagpa ag aka ag onilag humaglagnu heteb. Ag ahilagpa hena, ag bedulag amupa ag onilag okai aoglagnu heteb. ¹⁴ Amge da keeke laa binag ii mepa. Iita. Da Jesus Kristus, Nug ad emaitakpa mauhom amu nuhig udat amu oh am da binag mekul. Kristusnu ad emaitak gagatagpa amu wan imupan kobol oh da ii tonidteb. Da ele da kobol amu dim lamidkulnu ii daatem. ¹⁵ Danab nug gada

otadte, amuam keeke hamu amu danab gada ii otadte amu ele keeke hamu. Kayak Nug he, ig danab Kristusnu udat okaipa bau menuak aot daatem amuib am keeke ena, keeke genabnab daate. ¹⁶ Danab oh ag imunu dab mena, aon oolagpa mena, adan dim lamidna oiteb ele amu ag madod doopeg, Kayak Nug ahilagnu oo gai iita dookunu ool daate. Danab amu ag am Kayaknu danab, da ag oh anam aoglagnu ool daate.

¹⁷ Aria batakulnu amu da danab laa nug gada otadaknu nai amunu ug laa medakunu amu da ool ii daate. Adinu? Danab ag Jesus onignu oideg, dudupal da bedulpa daate, amupa nai da atem amuam genab daate ipunigte. ¹⁸ O lailad, ihinig Nadi Jesus Kristusnu ehanitak okai hamu megte amu ahilagpa dayad! Genab!

KAYAKNU NAI Tituanak Bau

The New Testament in the Nobonob Language of Papua New Guinea
Nupela Testamen long tokples Nobonob long Niugini

copyright © 1990 Wycliffe Bible Translators, Inc.

Language: Nobonob

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2013-02-07

PDF generated using Haiola and XeLaTeX on 27 Sep 2019 from source files dated 27 Sep 2019

ed374bb9-d819-53d1-a85b-f86cce3892e1